

Centrum A. auch eins/so mustu die regel mit dem absehen nit vff
legen/vnnd kanst es alles mit den zweyen spizlin verrichten ist vil
gewieffer künlicher vnd besser zugebruchen.

Das vierdt Capitel.

Wie mann in einem Thurn/ da zwey Fenster
ober einandern stahnd / inn die tieffe mes-
sen sol.

Wenn du vff einem Thurn werist / vnd du kein stand vffere
dem Thurn haben kanst / vnd du aber zwey Fenster glich
obeinanderen in dem Thurn hettist/ so thu im also. Gang
zu dem oberisten fenster in dem Thurn/ vnd stell das Instrument
an den stecken/wie du in dem vor genden Capitel gelehrt bist/vnnd
richt die Standregel mit dem buchstaben c. vnderwerts in den
Senckel: Demnach ruck die Regel mit dem buchstaben d. zu dem
grund des Thurns / so mit dem buchstaben F. verzeichnet/vnnd
sich darnach was für ein zal vff dem Winckelhacken e. abschnide
die Regel d. so finst du 20. puncten oder grad / die selbigen merck:
demnach nimb ein Senckel vnd misß von dem Instrument zu dem
anderen Fenster / so du dir zu einem stand erwellet hast/ so finst du
100. schuch. Als dann nimb das Instrument hinweg vnnd mach
ein gemerck da es gestanden ist/vnnd gang zu dem vndristen Fen-
ster/vnd mach das Instrument vest vnd ruck die Standregel mit
dem buchstaben b. hinauf vnd senckelrecht zu dem gemerck/so du
oben gemacht hast: demnach ruck die Regel mit dem buchstaben d.
vff den 20. puncten in dem Winckelhacken e. vnd mach sy vest: Als
dann nimb die Regel mit dem Absehen by dem puncten f. vnd leg
sy zwüschend dem a. b. vff der Stanregel in dem 100. punctē (die-
wyl du 100. schuch von einem Fenster zu dem andern hast funden)
vnd ruck sie zu dem Thurn by dem buchstabe F. wie du oben auch